

Fida Nyamesemka: Ayewoho 4, 2014.  
(Friday sermon –4<sup>th</sup> July 2014 – Fante Translation)

## **RAMADAN NYIRA BOSOM NO NE NSEM TSITSIR.**

“ O hom a a hom gye dzi! Woye akwankyin ama hom, de mbre woyee maa hon a wodzii hom enyim kan no, ama hom aye tsenenee” (2:184)

Oye Nyankopon n'adom ara kwa de Ramadan ato hen bio, bosom a woto no abaw a onnyhia wo nhyira mu. Nyankopon si no ewur de woye akwankyin nhye wo dem bosom yi mu, nnye de wodze hom yefun boto ho paa ara kwa fi anapa kepem ewimber bi mbom ama hom ato aako tsenenee ne nnye do.

Anohoba Mesia no (NN) see de “Onyaa a ofa akwankyen no wode okaakaa aber biara de akwankyen nnkyere de ebema okom adze wo ara kwa bi. Mbom onyaa no wo de onyaa nkakaa wo Nyankopon ho ama, oenya etuhoakye ama Nyankopon no oeyi wiadze akondodze akwa. Okaa de: Akwan kye kyere iyara de nyimpa beyi edziban kor bi akwa a ono oma honamdua no gyina na ofa edziban no a onam do ma okra no noho to no. Nkorofu wofa akwankyen onam Nyankopon ntsi no na wommfa no de oye kusumadze ara no, wo de wodze honho hen “Hamd” mu ( Allah N'enyunnamhye) Tasbih mu (yebese Subhanallah) na Tahlil mu; yebeka de “La ilaha illallahu” Nyame biara nnyi ho gyede Allah ama woenya dza oma nyimpa si gyina a wo ho no so.

Ampaara nokwar agyedzifo wo de wohen hamd na tasbih wo Ramadan mu prepi na wosom yie ama woenya mfaso a wo bosom kronkron yi mu. Nkomhyenyi Kronkron (NNN) kaa de akonkyen ye dadzeban eso oye abankuma a oko tsia ogya. Mbom, oba no dem ber a biribiara a nyimpa beye no oye no wo Nyankopon nsti na n'anafua na adzekyee nyinara oko do kaakaa Nyankopon na odua tsenenee kwan do.

Nyankopon ka de se nyimpa fa akomkyen na osi n'adwen gyina dem na oye dza otsen a, n'akonkyen no dan ye Nyankopon dze na Nyankopon nye akotua ma akonkyen no. Ndzeyee tsenenee a dem nkorofu yi ye no nnye dza oye ntwamuhen. Nnye Akonkyen ber no nko na wobedzi dem dwuma yi. woanya tseneneeye mu adwen na wodze Ramadan kor mu ndzeyepa sow Ramadan kor so do. Iyi nye dza wo de yetaa kyekye wo ho, mbom yebema tseneneeye n'ano kwan awar, eso yebetsim akyen kom yie na nnye de okom na nsukom bedze hen kwa ara kwa wo de yetse Ramadan hia a ohia no ase na nnye de yekyia henho nkorkor de “Ramadan Mubarak” na yeto bitsi wo de yenya adwen a okyere de aber biara yebenya tseneneeye ber yerebefa akonkyen anapa na yereka hen ano ewimber no. Ono de yekotsir bon a wodze bon hye ananmu, mbom, wo de yetaa tsinkomm na yeka de yerefa akonkyen. wo de yehu de onnyi de yeko tsia nyaa oaye hen bon no, onam de yenya Nyankopon hye no enyimnyam. Wokaa afa iyi ho de; Ampaara nyia oahye no enyimnyam mapa a wo hom mu nye wo Nyankopon enyim nye nyia oye tsenenee wo hom mu (49:14).

Dza Anohoba Mesia kyerewee no ne fa bi ka de: “Nyia Nyankopon sorsornyi no ahye no enyimnyam wo N'enyim nyge obi a oye ndzeyee tsenenee. Nyankopon bokora hon a woetu honho ama no na Oasee nkaafu no. Iyi se asem a oye dzen osiande ekuw ebien nnkotum abomu atsena wo ha, ono nye de, otseneefo na epowbofo na adzeseefo nnkotum atsena faakor. Oye adzhiadze papaapa de atseneneefo no wosee hon. Onam de Nyankopon nyim atseneneefo wo N'enyim ntsi oye adzhiadze kesekese! Otseneneenyi na ne tsir aye yie nyia oehu amandze nye nyia okahye n'ase.

Akɔnkyen tu tseneneeye kafo ma dem ntsi Nyankopɔn nam N'enyimpa na N'adom wo adasamba do nsti Ɖdze Satan ato mpokyerɛ mu wo Ramadan ber mu ama tseneneeye annyɛ dzen dɛ nsa baka. Naaso, sɛ ndzɛmba bi so wodze enyi kɔ do a wo ber a erekyen kom a, ɔno onyia no nam ndaadaa kwan do ntsi n'akɔnkyen no nnkesi hwee. Anohoba Mɛsia no (NN) aka dɛ ɔyɛ ndaadaa ma obi dɛ onnkefi ndzɛbɔn ho susuampaara dɛ ɔabɛhɛn ne Baiat mu naaso nna ndabraba wo n'akoma mu. Woato iyi dzin dɛ iyi yɛ dza ohia adwendwen dɛ Nyankopɔn Nkotsee na Obotum akyerɛ nyia ɔyɛ tseneneenyi. Dem ntsi dza yebotum ayɛ ara nye nnuho, "istighfar" (ɛbɔhwɛhwɛ bɔnfakye efi Allah nkyɛn), tasbih (dɛ ɛbɔntom Nyankopɔn) na hamd (ibeyi Nyankopɔn ayɛw).

Mbrɛ ɔtse biara no, hɛn Nyankopɔn No yɛ Obi a ɔwo ɔdo, ketseankye yɛdze hɛnho bɔbɔ afar ama no. Woaka dɛ wo Ramadhan bosom no mu no ɔbɛn nyimpa ama ketseankye wɔahwɛhwɛ ne Nyankopɔn N'adom mbordo. Dem sunsum mu adzesua yi wɔho bosom kor pɛr ntsi ɔwo dɛ yenya nomu mfaso nyinara, wo dem bosom yi mu no ndzeyɛɛ papa biara yɛyɛ no Nyame ntsi no sow aba pa a ɔyɛ akatua pii sɛ yɛdze toto nda nkaa a aka noho a. Ne dem ntsi, hom nsɔɛr na hom nsi hom Nyamesom pi dɛ mbrɛ Nyankopɔn Ne mbrasɛm kyɛrɛ, a hom robɔ anohoba dɛ dem suban yi nye hom betsen a fɛbɔɔ. Hom nsɔɛr na hom ntɛw hom Nyamesom ho na ɔnyɛ fɛw dɛ mbrɛ Nyankopɔn N'enyigyɛ kyɛrɛ wo botaa mu dɛ hom bɔbɔ mbɔdzen na hom ama abɛka hom daadaa abrabo ho. Hom nsɔɛr na hom nya nokwar sunsum na adwɛn a ɔma edzɛ enyidzɛ ma gyedzi kyɛn wiadzɛ yi mu abrabo wo dɛ bosom yi mu wo adwɛn mu dɛ iyi beyɛ hom abrabo mu botaa na hom nhyɛ iyi nɛw: '...na mma hom ntɔn Mɛ Nsenkyɛrdzɛ ahorow no nngyɛ bo ketsewaa bi...(2:42) Iyinom yɛ adwɛn mu nɛm a ɔyɛ Ramadan mu mfaso.

Nyankopɔn nhyɛ hɛn tseneneeye ara kɛkɛ na mbom Ɖda no edzi kyɛrɛ hɛn dɛ tseneneeye ma hɛn ara hɛn yiedzi na sɛ yiedzi Shariah no ekyir a, ɔno Nyankopɔn beyɛ hɛn Nyankopɔn wo ber a wiadzɛ yi mu mba nnkotum ayɛ hɛn mfaso wo kwan biara do! Woaka dɛ: 'Ampara dɛ, hɔnom dze, wonntum nnyɛ mfaso biara mma wo nntsia Nyankopɔn. (45:20) Dem ntsi, dɛ hom bɔhwɛhwɛ guansumabɛw efi nyimpa ho no hom nhwɛhwɛ ma odzi mu mfi Nyankopɔn Ne nkyɛn, Ɖno a ɔyɛ '...Nyenko ma atseneefo no' (45:29) Nyankopɔn aka dɛ Ɖpɛ nkorɔfo a wodzi dwuma wo Ɖno ntsi na woyɛ no wo tseneneeye mu: '...osipi dɛ, Nyankopɔn do Nyamesurofo no.' (3:77). Eɛnadzɛ na nyimpa bɛpɛ bio mu aber a woɛnya Nyankopɔn Ne do ewie? Na wo nsa aka wiadzɛ yi na wu ekyir nhyira ewie no! Nyankopɔn ka dɛ wiadzɛ yi mu nkorɔfo nnkotum enya ewie tɛ dɛ atseneefo no, nkorɔfo no a wogyina wiadzɛ yi mu nkorɔfo hɔn atɛtɛsee ano no na wɔhwɛhwɛ Nyankopɔn nkotsee ne mboa na wonntoto hɔnho ase mma wiadzɛ yi mu etumfo. Wɔbɛma nkorɔfo a wɔtɛ dem yi tum wo wiadzɛ yi mu na ɔyɛ hɔn na wobedzi nkunyim, Insha Allah.

Ndɛ wɔrɛtɛtɛsee Ahmadiyyafo wo Pakistan na aman ahorow do wɔka kyɛrɛ hɔn dɛ sɛ woyɛ sotsie ma nkorɔfo a wɔrɛtɛtɛsee hɔn no a wobeyi hɔn haw no nyinara efi ho na wɔagyɛ hɔn ato mu. Ma ɔtɛ biara no ɔwo dɛ yɛyɛ ahwɛyie osiandɛ iyi nyinara yɛ ndaadaa sɛm, dza wohu no ndɛ dɛ ɔyɛ hɔn nkunyimdzi no bɛdan abɛyɛ hɔn nkugu. Wiadzɛ yi mu mboa a wɔtwɛr na wodzi dzi hɔn dwuma nyinara no bɛhera dɛ dua a aporɔw. Nyankopɔn hɛ hɛn dɛ yɛbɛnya abotar na yɛahwɛhwɛ ɔno pɛ Ne mboa na ɔhyɛ bo dɛ nkorɔfo a wobedzi do no beyɛ ananmusifo wo asaase yi do. Iyi bɔhyɛ a wodzɛ hɛ Nkɔmhyɛnyi Krɔnkrɔn (NNN) na ɔnam n'adom ntsi, wodzɛ hɛ Anohoba Mɛsia (ANN) no so. Ampa ara dɛ, ɔwo dɛ yɛbɔ afar naaso ɔyɛ dem afarbo yi na ɔdze hɛn bɔkɔ nkunyimdzi mu na ɔbɔto hɔn ahɔtɛww mu na fa nɛmpa no ma hɔn dɛ: '...na mbom ewie no yɛ Nyamesurofo no dze.' (7:129)

Se Muslimfo no tsee nokwar no ase na woye bataboa boa Anohoba Mesia (ANN) no a nkye haw na abrebrese a wo Muslim aman do nyinara befir hon do. Atsetsee na nhyedo a oroko do wo Jihad dzin mu no besesa na aye odo na asomdwee! Hon edzikanfo na hon enyimdziifo no nyinara nnye tseneneeyefo na onam dem ntsi dom no nyinara a wodzi hon ekyir no ayew na hon nso nnyi tseneneeye. Etuatsewfo no daadaa hon ma woye ndzeyee a onnye ahotsew ndzeyee na enyimdziifo no ma wotse ase de se woye dwuma bon a otse dem yi a woben Nyankopon. Obiara nnyi ho a obotu mbabun yinom na Muslimfo yi fo de adze a woye no nnye tseneneeye, onnye Jihad, na nokwar a wo mu nye de otse wo fir tseneneeye ho. Na Nyankopon ahye nkorofa a woye egyedzifo no de woye: ‘...tsimbobor ma honho honho...’ (48:30)! Nyankopon nnkoma nkorofa a wotse dem yi ewie pa da na Onnkoye dem etsirmuodzinfo yi ananmusifo wo asaase yi mu da!

Ana Nyankopon botum aye nkorofa a wobo Khilafat nsabran ananmusifo wo asaase yi do anaa? Ana Nyankopon botum aboa etsirmuodzinfo no anaa? Nyankopon No a Osomaa Nkomhyenyi Kronkron (NNN) de ‘ehumbobor ma wiadze nyinara no! Obema etsirmuodzinfo yi atserew wo asaase yi do nyinara wo Ne Nkomhyenyi a Odo no ne dzin mu anaa? Ampara osipi nye de, Onnkoye da. Khilafat nhyehyee no woyee no de obenya Nyankopon Ne mboa na N’adom de mbre wohyee ho nkam maa Nkomhyenyi Kronkron (NNN) no na onam Anohoba Mesia (ANN) nodo abobo adze no. Nsabran biara a wobobo wo Khilafat dzin mu no woye de wobonya wiadze yi mu ahonya wo gyedzi dzin mu na woesiisii amanyosem.

Huzoor kaa de Fida a etwa mu kor no wonye no dzi mbisise wo TV kasafir bi do na okaa kyere hon de nokwar Khilafat no woetsintsim no dadaw. Nnye adze a wobotum dze nhyedo etsintsim Khilafat, Sorsor mboa na adom na wodze tsintsim. Se nka Muslim dom no tsee iyi ase a, nkye hon akoko akoko na tum mperho no begyaa. Hia aba de yebo mpae ma Muslim dom no Ramadhan bosom yi mu; osiande onam hon ntsi Islam n’etsiafo no renya akwanya dze Islam na Nkomhyenyi Kronkron (NNN) ho ekyingye reba. Onkyer biara, ofa no dem Khilafat nsemsem yi ho no, Nyamesom mu obemfo bi aka kasafi afa Khulafa e Rashideen na Nkomhyenyi Kronkron (NNN) honho. Muslimfo enyimdziifo na abanmu kandzifo no hon enyi aber reper tum na mbre osi a wobesi abo ho ban ho. Se obi yi dem kasafi a woka yi ano a, na oye Ahmadiyyafo na yeeyi ano so.

Dem nkorofa a woye Islam n’etsiafo na wowo adwenbon fa Nkomhyenyi Kronkron (NNN) noho no dze sen fofor (new film) a ofa Nkomhyenyi Kronkron (NNN) na Hadhrat Aishah (NN) honho a nde dua yi wo Washington na Berlin woriyi abo mu. Dem nkorofa yi dwen de, Nyame mpa ngu, wobotum edzi Nkomhyenyi Kronkron (NNN) ho atwetwe. Hon bra wo asaase yi do na hon wo ekyir besee naaso hon nnhu hon ewie. Nyankopon aka de dem nkorofa a wotse dem no nya ewiei bon. Hom nkasa ntsia dem sene yi wo ber a hom reye no wo mbra kwan do. Huzoor huu iyi ndeda ara na wabobo German Jama’at amandze ofa no iyi ho na woka akyere USA Jama’at no de wonye biribi mfa ho. Mbre otse biara no, Huzoor kaa de Ahmadiyyanyi biara botum akyere de odo Nkomhyenyi Kronkron (NNN) na oma no enyimnyam a oso a ono na ogyina de yebeka Durood mbordo. ‘Kronkronnyi nye Allah Ono a ayeyi nyinara fata No, Kronkronnyi nye Allah, Okokroko No, O Nyankopon hyira Muhammad na Muhammad ne nkorofa’. Nde dua yin a wo Ramadhan bosom yi mu no Ahmadiyyanyi biara nka Durood ma onye mframa no mu nyinara ma. Wo ber a iyi ye hen nyiano ma hen etsiafo hon dwumadzi no, osan so tsintsim tseneneeye wo hen mu na dem tseneneeye yin a oma hen nsempe de hen nsa beka ewieipa no. Islam n’atamfo no hon do betsew ma woka kumaa bi na wobehyew hon ase na ewiei pa beye nokwar tseneneeyefo no dze, Insha Allah!

Muslim domkuw no hia ntsease de oye bosam ne tum na adaadaa hon ma woroko etsia hon ara honho. Henfa na dem preko etuatsaw yi fir? Tum bi a ofir aboano na oreboa dem dwumadzi yi de mbre obeye a Islam ho beba ekyingye. Etum a wotse dem yi no wo hon mu na woredaadaa hon ma woreko na wo aboano so wodze sen a oye kasafi a ofa no Nkomhyenyi Kronkron (NNN) noho so rebu adze. Wonyim de sen a otse dem yi no onam ebufuw ntsi Muslimfo hon nyiano no dze basabasaye na ohaw beba na iyi boko ama dem etum yi ngyinado na wodze Islam ho ekyingye aba. Dem bosam etum yi dze bosam mframa dzen bi aba na obiara nnyi ho a obotum atwe Muslimfo no efir mu. Na kwan kor a owo ho ma hon so no wopow dem kwan no! Yembo mpaa de hon enyi beba honho do na wogye Anohoba Mesia (ANN) no ato mu na woehu Islam ne nkunyimdzi no.

Naaso ma Ahmadiyyafo no hon enyiwa nngye keke de wogye Anohoba Mesia (ANN) no ato mu na wonye Khilafat wo nkitsahodzi. Hia ba de yeko kan wo hen tseneneeye mu wo ber a yereye akomkyen yi de mbre obeye a yebeye Nyankopon Ne nokwar akowa, tseneneeye nye saafee no na Ramadhan ye akwanya kese a yedze boko kan wo tseneneeye mu na owo de obiara nya noho mfaso biara. Iyi ntsi Nyankopon ama hen akwankyere: 'Na iyi nye Buukuu no a yedze esan, no mu ye nhyira nkotsee. Ntsi hom ndzi do na hom mbo homho ban mfi bon ho ama wakyere hom ehumbobor' (6:156).

Se owo de hen nsa ka mfaso a owo Ramadhan yi mu a, se owo de yenya ewiei pa a, se owo de wobue nkodo abow na yenya Nyankopon N'ehumbobor na yennkoye tsede nkorofu na wonnyi kandzinyi na nkorofu daadaa hon ma wodzi hon atsenka ekyir dze dwuma a ommfata wo Islam ne dzin mu no a, ono Nyankopon aka de, hwe mbrasem a owo Kor'an no mu no na nya nya enyiwado adzehu wo mu na dwendwen Kor'an mbrasem noho wo Anohoba Mesia (ANN) n'enyiwa mu ono a Nyankopon asoma no wo dem mber yi mu onam nokwar ahobrase a oye dze ma Nkomhyenyi Kronkron (NNN). Anohoba Mesia (ANN) no se obi a orenndzi mbrasem aha esuon a owo Kor'an no mu no ohunn dem nyimpa node oka noho. De mbre meka no ahyease no iyi ye asem hia a owo de yedwendwen ho. Aber nyinara Nyankopon ye Ehumbobor na Woka de N'ehumbobor abow no da nyinara woebue n'ano ato ho ama nkorofu a wobeye tseneneefo.

Otoda a nkorofu binom bu hon enyiwa gu mbrasem no bi do onam wiadze apedze ntsi. Ahonya, mba, edwuma na wiadze mu ndzemba ye hon enyiwa do fefefew na ewiei no oma woye ndzemba a onnye tseneneeye, na mpo obordo ara ma wofir subanpa ne ban ano. Ndzemba nyinara fir Nyankopon ho; Ono na ahonya nyinara fir No. Se obi pe ahonya wo ber a oretwa ntor a, wober a orisisi nkorofu anaa onam ndaadaa kwan do a, ahonya a otse dem yi nnye akwanya papa mma no, ma otse biara no obeye akwanya bon dze ma no. Nyankopon se se yebotum atwe henho efir N'asotwe noho a gyede yefa kwanpa do nya hen ndzemba nyinara na ohotsewnyi na wodze ndemba nyinara ma no wo kwanpa do; dem ndzemba yi fir Nyankopon ho a onam akwan na akwanya a obor ntsease do. Woka no de: 'Na onyia biara a osuro Allah No, Obobuei kwan ama no' (65:3). 'Na Obema no wo bea a n'enyi nda. Na obiara odze ne were hye Allah mu no, Obeye n'adze nyinara. Ampaara, Allah si Ne botae gyina. Allah dze susupon ato biribiara ho' (65:4)

Anohoba Mesia (ANN) aka de oye Nyankopon N'adom de otwe ohotsewnyi fir wiadze yi mu ndzemba bon ho na Ono ara ma no ndzemba nyinara. Nyankopon bue kwan ma Nyamesuronyi wober a owo nsowe mu na Oma no ndzinoa wo ber a nyimpa n'enyiwa nda. Ose nkorofu a woka de woye atseneneefo naaso worehya ahokyer pii no na ofir de wowo wiadze yi mu pe pii wo hon mu anaa so de hon tseneneeye no nndzi mu. Wo kwan biara do no dza Nyankopon aka no nnkotum aye mfum! Ebi nom beka de nkorofu a wonnye egyedzifo no wo ahonya bebiree na hon asetsena mu so ye ahotu. Mbere otse biara no, Anohoba Mesia

(ANN) no kaa de ehun no wo enyiwado de hon enyi agye naaso hon abrabo no ayehon basaa na hon enyiwa nngye anaa biribi haw hon. Nkorofa a wotse dem no hwehwe hon honam dua no mu enyigye na asomdwee ekyir no tsede mbre osi nkorofa a wonom edur bon ye no. Se obi ye nokwar chotsewnyi a aber nyinara noowo akomatoyam kansa biribiara nnyi ho mpo a. Ampa ara de, oye Nyankopon Ne nhyira se obi nnyi pe bebiree a noho nnyi mfaso a! Owu de Ahmadiyyafo bo honho mbodzen na wotsintsim dem suban yi wo hon mu wo Ramadhan yi mu a woesiisii wiadze yi mu enyigye gyede dza woama ho kwan no. Ampa ara de, ahotsewfo a woowo ahonya see hon ahonya no dze hwehwe Nyankopon N'enyigye. Huzoor kaa de nda kakra a etwa mu no na orehwe buukuu bi a ofa no Chaudhry Zafrullah Sahib noho a Bashir Rafiq Sahib na okyerewe. Na asem bi wo mu a ofa no amanyenyi bi a owo sika ho, se onye n'ebusua ko London ahenkro mu a ohain ahomgye bea no fa kor. Dakor ono nkotsee na okoree naaso osan kohai ahomgyeebea ne fa ne bio mu na asem a okaa ara nye de owo sika a odze botua ntsi no nnye adze a obetsena bea a onndzi mu ma no. Obisaa Chaudhry Sahib bea a otse, Chaudhry Sahib kaa kyere no de onye Bashir Rafiq tse Mission fie mu ma ho ara so na odzidzi. Amanyenyi sikanyi no kaa de ebenadze ntsi na Chaudhry Sahib nndzi n'ahonya noho mfaso na otse bea a oye ahokyer! Chaudhry Sahib kaa kyere amanyenyi node ber a ono dzi ne sika basa basa no, ono odze ne dze sie na odze ye edwuma wo skuul mbofra hon adzesuado na odze boa nkorofa a wonnyi bi na mboborfo. Odze kaa ho de adwen mu asomdwee a iyi dze ma no no wiadze yi mu nyimpa biara nnkotum enya bi na okaa de obo mpaa de amenyenyi sikanyi no so bohu dem adwen mu asomdwee yi.

Iyi nom ye nkorofa a woeye yie wo wiadze yi mu naaso hon ammfa honho ato wiadze yi do. Oye dem ahotseweefo yi na woabo hon anohoba a ofa no trow wo asaase yi do na owu ekyir no. Ketseankye Nyankopon beye hen mboa ma hen nsa aka mfaso efir dem Ramadhan yi mu wo kwan a obema tseneneeye gyinabew abeka hen abrabo su ho na ketseankye hen nsa beka Ne trow no wiadze ebien nyinara mu na ketseankye hen ewiei beye papa na yebeye Islam ne nokwar ahwedofa. Ketseankye yedze hen enumsem, hen ndzeyee na hen mpaabo bobo Islam atamfo hon etuatsew egu. Nde dua yi Anohoba Mesia (ANN) ne Jama'at pe na onye Islam etsiafo no hon bosam tum no bedzi esi. Muslimfo no nnsuo hon akwanya mu, beka node kandzinyi a owo tsirmupow papa na oye soronko wo hon mu, na iyi so mpo no wonnsuo mu dzen. Woeye hon adwen de wobeye nkunyimdzifo se wohwehwe mboa fir aboano a! Wober a nokwar nye de woapa hon wo hon nsusubon efir no mu a obesee hon. Hen afutu nnto hon aso mu; nokwar mu no yedwen honho naaso wotsia hen! Hia ba de yebob mpaa dze ma Muslim dom no na yebob mpaa so dze ma Ahmadiyyafo a woretsetsee hon no. Dza obor biribiara do no owo de yebob mpaa de hen nsa beka tseneneeye wo dem Ramadhan bosom yi mu de mbre onam do a Islam atamfo no bohwe ase. Ketseankye Nyankopon dze nokwar nsesa beba hen mu wo Ramadhan yi mu!

Translated by: 1. Mr. Alhassan Kobina Atta-Wenchie

(Tutor in English Language, Jamiatul Mubashireen, Ghana)

2. Maulvi Alhassan Bashir Annan Sahib

(Tutor, Jamiatul Mubashireen, Ghana)

3. Rasheed Possible Essuman Sahib

(Second Year Student, Jamiatul Mubashireen, Ghana)

4. Hafiz Naseem Ahmad Nyame Sahib

(Composer, First Year Student, Jamiatul Mubashireen, Ghana)

Downloaded from: [www.jamiatulmubashireen.org](http://www.jamiatulmubashireen.org)

Contact: [www.jamiatulmubashireen.org/contact-us](http://www.jamiatulmubashireen.org/contact-us)